

Minister Paul Croes

Negociacionnan cu Citgo ta continua den direccion positivo

ORANJESTAD (AAN): Recientemente Minister Paul Croes hunto cu Minister Mike de Meza y un ekipo grandi di expertonan a bishita Houston pa asina sigui dialoga riba e acuerdo pa re-apertura di refinaria. Un bishita sumamente positivo, caminda e ekipo tecnico, huridico, financiero y economico a haci un bon trabou na momento di sinta cu e team di Citgo y haci tur esfuerso necesario pa yega na e documento final pa asina firma esaki dia 31 di Maart proximo. E dia aki lo ta uno sumamente grandi y importante mirando e impacto cu esaki lo tin pa nos pais. Pa algun aña caba Minister de Meza a tuma e empeño pa por logra yega na un reapertura di e refinaria y poco poco Gobierno ta yegando mas cerca di e realidad aki. Segun Minister Paul Croes, esaki lo ta un realidad unda cu e impacto economico ta bay ta uno hopi grandi y e impacto laboral tambe lo bai ta hopi importante. Lo conoce un impulso grandi caminda mas hende lo tin e oportunidad di desplega trabou den un refinaria. "Aruba a conoce y a biba di e pilar economico aki pa hopi aña, pa cual rason, nos sa cu tin hopi hende local cu lo ta interesa pa un trabao na

e momento cu esaki habri," asina Minister Croes a bisa añadiendo cu: "E mensahe aki ta loke nos a trece padilanti tambe na ehecutivonan di Citgo na Houston." Adicionalmente a atende durante e encuentro na Houston, tocante e proceso di permisonan unabes cu companianan kier trece hendenan di afo pa traha den cierto ramonan specialisa. E delegacion Arubiano a duna di conoce na e ehecutivonan petrolero cu aki lo tin un proceso specifico pa atende cune pa asina haci esaki posibel. Mara na e topico aki, a duna un actualisacion riba loke ta e Citgo Desk na Aruba. Minister di Labor a indica cu ta existi un entusiasmo halto di personanan cu kier bin Aruba bek pa traha na nan pais den e refinaria. "Na e momentonan aki ta tumando nombernan y nan curriculum pa, ora ta asina leu, por presenta esaki na e compania pa asina nan por evalua y tuma e personanan den servicio," e mandatario a duna di conoce. Finalmente por bisa cu Minister Paul Croes ta sumamente satisfecho cu e bishita na Houston y, aunke ta contento cu e progreso, ta duna di conoce cu e decisionnan di mas grandi y importante ta keda riba nivel politico y hunto cu directiva di Citgo ta trahando riba e acu-



erdo final. Asina mes, e sentimiento general di e Minister ta uno hopi positivo mirando

adelantonan grandi riba diferente punto di discusion. Awor no ta keda nada otro pa warda

ansiosamente riba 31 di maart caminda oficialmente por anuncia e reapertura.